



Amnon fils aîné de David commet par force inceste avec sa sœur Thamar; & par vengeance son frere Absalom le fait tuer.

ADVINT qu'Amnon premier fils de David, fut tellement épris du fol amour enuers Thamar sœur d'Absalom, qu'il en deuint malade, dont par le conseil de Ionadab il persuada son pere David d'enuoyer sa sœur Thamar luy preparer des viandes pour son manger; & l'ayant attirée par cette cautele en sa chambre, commit avec elle inceste par force. Puis la haïssant plus qu'il ne l'auoit aymée, la mit hors, dont elle mena grand dueil, & rompit sa robe, disant; Le mal que tu fais maintenant est plus grand que celui que tu as fait auparauant. Absalom ayant sceu le faict, la consola, & dissimulant la vengeance, n'en dit aucune chose, comme aussi ne fit David, qui en fut fort contristé. Or pour ce faict, Absalom haïssoit Amnon. Cette haine fut occasion que deux ans apres, lors qu'Absalom faisoit tondre ses brebis, il conuia son pere David, & tous les autres freres au banquet: Mais David s'en excusant y enuoya Amnon, lequel estant à table, Absalom le fit occire par ses seruiteurs, en presence de ses autres freres, qui s'enfuirent vers David, lequel en fut fort déplaisant; & Absalom s'enfuit vers le Roy de Gessur, où il fut par trois ans absent, éuitant la fureur de son pere David.